

GUILTS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze baaad me lo guidzliu; grop diag no bdzion no grë mine bnee me, grop lo no bdzion no grë mine been me; sac bdzionpaa no zha rac me, zha rnee me, haxta bzhieen no nia me.

² Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh. Zaatne no Dios men ne nac Pxoze, ga no me; zeene baaad me lo guidzliu dzigo bdziunbey no me. ³ Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grë ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpëed me. ⁴ Laa naa rnee grë min rii lo to lo guits ne rxel naa nu, zeena zigne nonley zdo no scaquegaa to tsonley zdo to.

⁵ Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guiend zaatne no me; laa grë dol, masaque naca zig nac guielcow. Ni mincoque gon rnee no lo to. ⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. ⁷ Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grë ne; ni scagaa, xchen Jesús nac mine csanmbe ne lo grëtaa xtol ne.

⁸ Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne. ⁹ Sanguete telne

cxobdol ne grēse xtol ne lo Dios, ible tedsod silaa me ne lo grētaa dol co, sanmbe me ne lo grētaa guielntseeb ne zidziuun ne; sac ible laa Jesús gut par csanmbe me ne. ¹⁰ Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grēse ne miech ngoopdol nac ne.

2

¹ Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoz ne yquia zdoo me ne, lëe men co nac Jesús, lo me golbig (tel me ni tib dol rapd me). ² Sac me bded grētaa guielnë ne rioguaļ ne ndieed ne por grētaa xtol ne, psanwen me ne lo Dios; me goc zig tib gon ne pcaania Dios gozh grēse xtol ne, ni xtol grēraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grēse mine rnabey Dios, gase rien ne ne nli xnëz me no ne. ⁴ Laa tel zha ne rnee: “Xnëz me no naa”, ni rlozh ga rund zho grë mine rnabey me, rquidie zho ga. ⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne. ⁶ Gacxe nagon waa, zha ne rnee xnëz me no zho, ib none zaacse gban zho, zigne wban Jesús zeene biaad me lo guidzliu.

⁷ Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhobneew, niicle ne pquiaadiagle tow, ⁸ per rrieequia ncuba niina; sac gon zeene biaad Jesús, me blu ganle zha none gleynie ne

samiech ne. Ni scagaa niina ne laa to zienala, laa to noriee lo guielcow ne no to glo, laa to nozëeb nëz lo xbiini Dios.

⁹ Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho. ¹⁰ Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho; ¹¹ sangue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha riend dien pa nëz tsie zho, sac guielcow co quiantse lo zho.

¹² Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtol to. ¹³ To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rriyelodraa mendox yquiil ma to. To ne nac to mëëdlas, xin yeena laa naa rxel diidz rii lo to, porne nac to zha ne nole xnëz Dios men ne nac Pxoze.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa mendox yquiil, ¹⁵ golguien, gleyniede to grë ncuaane rap to, gleyniede to grë ncuaan ndzinlid ne rac lo guidzliu rii. Zha ne rleynie grë ncuaan co, nlid rleynie zho Dios men ne nac Pxoze; ¹⁶ sac grëse ncuaane rac lo guidzliu rii (zig nac zha ne zienal ncuaane gdeedguxt xcuerp, zha ne rzoobladz yquianie ncuaane rdziladztaa, zha ne racniats lo samiech), grëse ncuaan co led Diosd rnabeya, sinque lëë mine rzonal grëraa miech lo guidzliu ga. ¹⁷ Ni na tel zig nac guidzliu, zig zie dze laaw quialozh grëw grë ncuaane rleynie miech low; sangue zha ne mban zigne rnabey Dios, laa zho bgaale tib guielmban ne gdzind dze lozh.

Zha ne rlëenie Jesús

¹⁸ Xin yeena, zhile gdziñ dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina len dze rii ndal-le zaatne norieequia grë zha ne rsilo quiatsidil Xtiidz me; gane ndion no ne laa dze co ziaadgaxle. ¹⁹ Nli ladaque zha ne nacgrë ne brieegrë zha co, per nlid naciepaa zho ne; sac tel niaca mine nli-paa nacie zho ne, nrieextsod zho. Ga nagon blu zho ne nlid nacgrë zho ne.

²⁰ Sangue to, nacde to zig nac grë zha co, sac nacie Espíritu Sant to, bneedz me guielbiini lo to runbey to mine nac diidzli. ²¹ Guits ne rxel naa lo to nu, nacda par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

²² Grë zha ne rnee i nlid lëe Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca rliladz zho cho nac me, yele Pxoz me ga rliladz zho. ²³ Sac zha ne rlëenie men ne nac Xpëed Dios, ga rlu ne nlid rliladz zho cho nac Dios; sangue zha ne rxobnen cho nac Xpëed me, zha cosi nli rliladz zho cho nac me. ²⁴ Laa naa rso diidz lo to sca: Goltsienal grë mine pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbannie to me. ²⁵ Golsoladz ganle, laa Jesús psanle diidz ne ib zgaa ne tib guielmban ne gdziñ dze lozh; lëe guielmban co yгаа grëse zha ne nacie me.

²⁶ Laa naa rzet min rii lo to, sac ne squi no grë zha ne ziaad racladz yquidie to. ²⁷ Sangue to laa Jesús pxeelle Espíritu Sant nacie to, rquiind ne goon chora cseed to; sac Espíritu Santzhal nneedz guielbiini lo to rien to zha nac grëraa ncuaane no gacnan to, ni mesi gon mine nac diidzli min co rseed me to, led yed me rquidie. Golguien

sca, Jesús golbannie, golbannie me zigne noseed Espiritu Sant to.

Zha ne nac xpëéd Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ine tibliladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaan zho lo me. ²⁹ Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëéd me ible zdeed me mine rieguial zho.

3

¹ Golwi ganle pa lotaa rleyne Dios ne, laa me rneedz diidz laa ne gac mëéd lo me. ¡Ni nligaa tel ne, xpëédle me nac ne! Grëraa miech riladzd zhow, sacne runbeyd zho cho nac me.

² Bets, bzian, ne nligaa xpëédle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. ³ Ni grëse zha ne zienie guic yгаа guelnzaac co, tibaque rioxco zho zig zie dze nosaan zho ncuane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguiits zho, sac grëse dol ne runtaa miech ga rlu ganle ne rond zho mine rnabey me. ⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nlipaa nacie me, zienaldraa zho ncuane gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios; ⁸ sangue grë zha ne tibaque quiayunctal xtol, xnëz mendox ga ngab zho; sac tel mendox, desde padzeela tibaque guielntseeb quiayun ma. Ni min co nagon nacne biaadpaa Xpëed Dios lo guidzliu, biaadnitlo me grëtaa ncuane run ma. ⁹ Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espiritu Sant, men ne nacnie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nieenpaa cho nac xpëed Dios, chogaa nac xpëed mendox, sac grëse zha ne run guielntseeb, grëse zha ne rleynie samiech, led xpëete Dios nac zho; ¹¹ sac gon, desde dze ne psilo bliladz to Xtiidz Dios, bingazh to ib none gleyne ne samiech ne. ¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to mine been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsoode to zhgab guiab to pe nacne sca run zho. ¹⁴ Sangue ne rleyne ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdzindraa dze lozh; sac zha ne rleynie samiech, nëz ne nitlo zho ga zie zho. ¹⁵ Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga. ¹⁶ Ndion ne zha gleyne ne samiech ne, sac Jesússhal blu zhaw zeene sca bleeladz me me gut me bdiizh me xtol ne. Gacxe waa, zha ne nliipaa rleyne samiech, none cueeladz zho zho, cueeladz zho ncuane rap zho, gacnie zho samiech zho. ¹⁷ Gzoob ne, tib zha ne rnee xnëz Dios no zho, nroob rapchen zho, ranlo zho

rcaalsad pe yquiin tib zha ne nacgrë zho, per ib rdeete zho palal pe yquiin zha co. ¿Niacxe na nli rleynie zha co samiech zho ga? ¹⁸ Xin yeena, golgacnan sca ganle, led loxaque diidzdse, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdoo ne zeene laa ne gbig lo me. ²⁰ Tel zha ne rdzieb zdoo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me. ²¹ Xin yeena, laa zha ne desde zdoo zho nan zho noguiitsd zho mine rnabey me, scagaa tibiladzse gbig zho lo me; ²² hor cosi ncuanea gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuanea rdziladz me. ²³ Ni lëë min rii rnabey me: Grëse miech, none dib zdoo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. ²⁴ Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espíritu Sant nacie ne.

4

¹ Bets, bzian, zha ne gnë zhiEspíritu Dios nacie zho, goon ye zho quianee Xtiidz me lo miech; ib gunde to ne lëëlëd gliladz to xtiidz zho, sinque golwigazh dien pe nli zhiEspíritu Dios nacie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. ² Parne guien to dien pe nli zhiEspíritu Dios nacie zho, golwi dien zha rzac zho Jesús: Tel zha ne rliladz ne nli zig tib miech goc me biaad me lo guidzliu, ga rlu ne nli zhiEspíritu Dios nacie zho. ³ Laa tel rliladzd zho ne nli sca biaad me, nlid dzigo zhiEspíritu Dios nacie zho; sinque

lëele espíritu ne rtsidil Jesús ga nacie zho. Laa to binle ganle ib laa espíritu co guiaad; ni lëele espíritu ntseeb co nacie grë zha ne squi quianzë lo guidzliu niina.

⁴ Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacie to, lëdle espíritu ne nacie grë zha ne sca zienal grë wseed yozh ne no lo guidzliu. ⁵ Grë zha co, ncuane rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleyne grë ncuuan co, zha co riladz zhiwseed zho. ⁶ Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacie zhiEspíritu Dios, ni cho zhagaa nacie espíritu ne ziaadquidie miech.

Rleyne Dios miech

⁷ Bets, bzian, golgotsaa gleynie ne samiech ne, sac gon, tel Dios grëse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpëed Dios nac zho, nli runbey zho me. ⁸ Laa grë zha ne rleyne samiech, runbeyd zho Dios ga gane sca run zho; sac gon ib Dios rneedz guielbiini lo ne gleynie ne samiech ne. ⁹ Gotsaa gwi ne ganle, pa lotaa rleyne me ne: Tibpaa Xpëed me, ni pxeel me me biaadtizh me xtol ne, zeena ygaa ne tib guielmban ndzon ne gdziñd dze lozh. ¹⁰ Led guiabd ne togo glo miech bleynie Dios gane rleyne me zho niina; led scada, sinque ible zdoo me gola rleyne me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleyne Dios ne.

¹¹ Bets, bzian, zigne scataa rleyne Dios ne, scaquegaa ne nagon none gleynie ne samiech ne. ¹² Gard tso tib zha ne gan Dios, per zha ne rleyne samiech, me ga nacie zho; ni zigse zie dze dib zdooraa zho rleyne zho samiech zho.

¹³ Me nac men ne pxeel zhiEspíritu me nacie no, parne glu nacie me no, ni scagaa no nacie no me. ¹⁴ Ni stiba, grop lo no bdzion no biaad Xpëed me biaadsilaa me miech lo dol; ni min co nonee no lo miech niina. ¹⁵ Grëse zha ne riladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

¹⁶ Ndion ne ganle nli rleyniedox Dios ne, sac rienpaa ne rleynie me ne, ni riladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacie zho Dios, ni scagaa me nacie me zho. ¹⁷ Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziñ dze ne laa me gun xquielwxtis me; sinque haxta gley ne dzian ne me gal dze co. ¹⁸ Nod pe nacie gdzieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne. ²⁰ Tel zha ne rnee, rleynie zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ¿pe lele Dios dzigo gliladz ne nli rleynie zho, ni nac me men ne rand zho? ²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

5

Zac csaan ne ncuaane runctal xtol ne

¹⁻² Grëse zha ne dib zdoo rililadz ne ible lëe Men ne zëëble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed.

³ Sac zeene rleynie ne Dios, zun ne grëse mine rnabey me. Ni grë mine rnabey Dios, nacda ncuaane guiab ne grieelod gun ne; ⁴ sac grëse zha ne nacle xpëed Dios, totsaque rnalo zho ne Jesús gun xyudar zho, gac-wetraade zho lo grë ncuaane gunctal xtol zho. ⁵ Golgacnan sca: zha ne dib zdoo rililadz Xpëed Dios nac Jesús, zrieelo zho csaan zho grëtaa ncuaane runctal xtol zho.

⁶ Tel ne, ndion ne ni rililadz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espíritu Sant nolu ganle ne scaw, ni mine rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por mine nolu Espíritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espíritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. ⁹ Mine rnee Dios, none gliladz new. Xtiidz samiech ne name rililadz ne, ¿pe lel mine rnee Dios dzigo gliladz ne? ¹⁰ Zha ne gliladz mine rnee Dios, rriequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús. ¹¹ Laa me bneele ganle: zha ne gnalo Xpëed me, zгаа zho tib guieľmban ndzon ne gdziñd dze lozh; sac Xpëedse me rdeed guieľmban co. ¹² Gacxe waa, zha ne

rnaló Xpëéd me, laa zho bgaale guielmban ndzon co; sangue zha ne rnalod Xpëéd me, gard yгаа zhow.

Bgaale to guielmban ne gdziṅd dze lozh

¹³ To ne nac to zha ne rnalole Xpëéd Dios, laa naa rzet miṅ rii lo to zeena gacnan to ganle laa to bgaale guielmban ne gdziṅdraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuaane rio zdoo me rnab ne lo me; ¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

¹⁶ Zig nac zeene gan to cho tib zha ne nacgré to been pe tib doḷ, ni rlu nacda doḷ ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no doḷ ne rnitlo, ni zha ne gun doḷ co, nodne gnab to lo Dios gun me zho perdon. ¹⁷ Nli grëse guielntseeb doḷ naca, per no mine rnitlod miech. ¹⁸ Ni ndion ne ganle, zha ne nacle xpëéd Dios rundraa zho ne lega gunctal zho xtoḷ zho; sac Jesús men ne nac Xpëéd Dios, men co quianap zho, grieelodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zienaḷ ncuaane rnabey mendox, ²⁰ sangue ne, laa Xpëéd Dios bиаad bdixbiini me xquielrien ne bdziuunbey ne men ne nacpaa Dios. Niinasi laa ne ngable lo men ne nacpaa Dios ga, ni lëë me ga nac Jesús. Me nac Dios nguiamban, ni me nac men ne rdeed guielmban ndzon ne gdziṅd dze lozh.

²¹ Xin yeena, golguien Diosse nac men ne gleynie to; gunde to ne leḷ grë ncuaane no lo guidzliu rii gleynie to, laa ne gleynie to Dios.

Juan

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)
copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 9 Jun 2022

5317ca58-7555-5e4c-a420-e1e9210e2df2